

司鼓留藁以遺後人程君士龍寔為代用能成公之志丙申六月書成而公以乙未六月先為古人矣又繼之者有江君

師心

復為訂刊者之誤書於是乎有傳公去常越十有二年

丙午冬

如杞

承乏佐州遠繼其後時庭雙檜可比甘棠緬想

典刑儼然如在公餘取所刊版鱗次先後遇版有蠹蝕者字有漫漶者即命工補治之及訂其偏旁差訛者數字益嚴局鐫守護惟謹庶可以詔久傳遠嗚呼哲人云亡猶幸是書之僅存也讀其書如見其人因其言以求其心無愧前修後學者事跡襲舊梓非曰敢私敬誌下方尤有望於來者淳祐丁未月正元日承議郎通判常州軍州事古贊盛

如杞謹書

古文苑者唐人所編史傳所不載文選所不錄之文也歌詩

賦頌書狀箴銘碑記雜文為體二十有一為編二百六十有四附入者七始於周宣石鼓文終於齊永明之倡和上下一千三百年間世道之升降風俗之醇漓政治之得失人才之高下於此而槩見之可謂萃眾作之英華擅文人之巨偉也至別而觀之如岐陽蒐狩實肇中興之美勒石紀功詞章渾厚足以補詩雅之遺佚泗水碑銘鋪揚興王之盛敘功考德表裏名實足以續閎散之芳烈楊子雲倣虞作箴官箴王闕所以輔正心術警戒幾微殆與聖賢盤盂几杖之銘爭光千古有國家者宜保之以為龜鑑所謂傑然詩書之後詎容徒以文章論哉世代踰邈遺文彫耗若昔賢所欲興致太學以助論切之真蹟今既不可復得而浮磬之刻蔚宗之注與隋